



SUATEA



COMUNICÁU DE PRENSA: EDUCACIÓN

El gobiernu asturianu enfotáu en caltener la discriminación salarial magar les sentencies en contra.

Organizaciones presentes na Mesa llevaes a la movilización.

Centenares de docentes entamen los trámites p'algamar la estensión de sentencia.

La mesa Sectorial d'Educación volvió a retomar les sesiones alrodiu al Anteproyectu de Llei col que'l gobiernu pretende llexitimar una actuación que los tribunales consideraron discriminatoria. **SUATEA** alvirtió a l'Administración de que nun ye posible seguir pel mesmu camín entamáu, reeditando un procesu asemeyáu al que fue anuláu. El gobiernu, magar que reconociere que les sos actuaciones nun tenien base llegal, sigue negándose a acabar con una discriminación qu'afecta a milenta docentes y tamién a funcionarios del conxuntu de l'Administración.

SUATEA argumentó la imposibilidá de desarrollar una llei encontada nel artículu 106 de la LOE pues dende'l puntu de vista d'esa Llei Orgánica, el gobiernu asturianu nun pue pretender que'l Parllamentu apruebe una Llei que consagre la discriminación enre iguales. Trátase de nun entamar un procesu que puidere ser anuláu como l'anterior, sinón de buscar les bases pa un alcuertu que satisfaga a toles partes.

Pa **SUATEA** ye imprescindible:

1. Remodelar el testu presentáu de manera que se tresforme nuna llei pa la meyora de la enseñanza pública asturiana.
2. Plantegar una campaña pública de valoración de la función docente que pase por meyorar la imaxe y la consideración de los docentes abriendo pasu a un alderique sobre les midíes que dende'l profesoráu se consideren como imprescindibles pa esa meyora.
3. Afalar la convivencia nos centros ente docentes acabando coles discriminaciones salariales esistentes esparciendo'l pagu a tol profesoráu nes mesmes condiciones, inxerendo a los que vienen cumpliendo les mesmes dende'l 1 xineru de 2007.
4. Meyorar nesi sen les retribuciones docentes aumentando, por exemplu, les cantidaes correspondientes a los "sexenios" pa tol profesoráu. Trátase d'un complementu que sólo cobren los docentes polo que consideramos que l'ámbitu de negociación del mesmu ye la mesa sectorial d'educación. El complementu específicu puedser otra vía pa desarrollar esa homologación.
5. Inxerir nesa llei referencies a los desarrollos de la LOE pendientes n'Asturies como son la merma de xornada pa mayores de 55 años, l'establecimientu de llicencies asemeyaes a lo que n'otres CCAA se nomen "añu sabáticu"; asina como la garantía d'abrir negociaciones na mesa sectorial pa estos desarrollos.
6. Avanzar nuna real negociación: seguir el camín entamáu que marquen los borradores de la llei presentaos en mesa nun lleva a nenguna parte y sólo pue xenerar más descontentu nel 40% del profesoráu asturianu que nun ta cobrando lo mesmo que los sos compañeros n'idéntica situación.

SUATEA quier dexar claro al conxuntu del profesoráu qu'esta llei perxudícalo gravemente al venceyar la evaluación al cobru de retribuciones, lo cual, anguaño, nun tien encontu llegal nengún, yá que'l tan mentáu Estatutu Docente nin siquiera esiste.

Per otru llau, dende **SUATEA** tán entamándose les correspondientes reclamaciones pa solicitar la estensión de sentencia coles instrucciones que figuren na nuestra páxina Web.

Amás aniciáronse contactos na Xunta Personal p'afalar movilizaciónes lo más unitaries posibles qu'esixan al gobiernu a acabar cola grave discriminación salarial y a abrir negociaciones pola meyora de la enseñanza pública asturiana.

Uviéu, 15 d'ochobre de 2009

SINDICATU UNITARIU Y AUTÓNOMU DE TRABAYADORES DE LA ENSEÑANZA D'ASTURIES

C/ Telesforo Cuevas 2, 1^u A dcha. -33005 Uviéu. Tfno. 985 274 343. Fax. 985 236 464. E-mail: suatea@suatea.org Web: www.suatea.org